

Mga nilalaman:

Naval Station Carlito Cunanan-	P4
Manggagawang Palaweno, magkaisa-	P6
Tutulan ang SIM card reg law-	P8
Kolonyal na pagsasanay-	P9
Oil Drilling sa Cadlao-	P10
Ang WESCOM, AFP-PNP at tropang US	
ang terorista sa Palawan-	P11
Pulang Saludo: Ka Joma-	P12

Ang Pulang Larangan

TOMO VII BLG.3 REBOLUSYONARYONG PAHAYAGANG MASA SA PALAWAN OKTUBRE-DISYEMBRE 2022

Tutulan at labanan ang tumitinding panghihimasok ng imperyalismong US sa bansa! Igiit at ipagtanggol ang pambansang soberanya!



Muling pinatunayan ng rehimeng Marcos II ang garapalang pangangayupapa nito sa imperyalismong US sa katatapos na pagbisita ni US Vice President Kamala Harris sa bansa nitong Nobyembre. Hawak ang bagong estratehiyang militar ng US sa rehiyong Indo-Pacific, dala ni Harris ang bagong mga kasunduan para patatagin ang kontrol nito sa Pilipinas, bilang isang andana ng depensa nito sa rehiyon laban sa China na banta sa kanyang pandaigdig na hegemonya at sa anti-imperyalistang bansang Democratic People's Republic of Korea (DPRK). Gamit ang makaisang-panig na Enhanced Defense Cooperation Agreement (EDCA), nilalayan ng US na dagdagan ang mga base militar nito sa bansa, partikular ang mga nakaharap sa South China Sea, kabilang ang Palawan. Kapalit nito ang limos na pautang at pagbibigay ng mga papaug-paog at pinaglumaang kagamitang militar ng US sa papet na AFP at rehimen.

Tahasang pagyurak sa soberanya ng bansa ang pananatili ng mga base at pasilidad militar ng US rito. Malaon na itong itinakwil at pinalayas ng nagkakaisang pagkilos ng sambayanang Pilipino kasabay ng pagbabasura sa kasunduan sa pagitan ng dalawang bansa kaugnay sa pagtatayo ng base militar ng US noong 1991. Ngunit ilang taon lamang matapos ito, tusong pumasok sa mga tagibang na kasunduan ang mga sumunod na rehimen para gawing lehitimo ang pagbabalik at pananatili ng mga tropa at pasilidad militar ng US sa mga kampo ng AFP.

Pinasok ng rehimeng US-Ramos ang Mutual Logistics and Support Agreement (MLSA) noong 1992, Visiting Forces Agreement (VFA) ng rehimeng US-Estrada noong 1999 at EDCA ng rehimeng US-BS Aquino pagsapit ng 2014. Sa Palawan, matapos ipatupad ang EDCA noong 2014 ay itinayo ang base militar ng US sa kampo ng Philippine Navy sa Oyster Bay, saklaw ng Ulugan Bay at sa loob ng Antonio Bautista Air Base, kapwa sa Puerto Princesa City.

Pinapaypayan at ibayo pang pinatitindi ang tensyong namumuo sa South China Sea ng nagpapatuloy na agresibong

aktibidad ng US sa Asya, partikular sa Timog at Timog-silangang Asya. Malinaw na pang-uupat ng gera sa rehiyon ang nagpapatuloy na masinsing mga aktibidad militar ng US at mga kaalyado nito. Sa Palawan pa lamang, anim na pagsasanay-militar sa pagitan ng tropang US at papet na AFP ang inilunsad ngayong taon, bukod pa rito ang ilang beses na pagrerekurida ng USS Carl Vinson sa karagatang saklaw ng West Philippine Sea (WPS) kasabay ng iba pang aktibidad ng tropang US at mga kaalyadong bansa nito sa South China Sea.

Ang pagpaling ng US sa Indo-Pacific ay bahagi ng pag-ensirkulo sa China na nakikita niya bilang estratehikong banta sa kanyang hegemonyang pang-ekonomya at militar sa rehiyon at buong mundo. Dagdag pa, ang pagkakaroon ng mga gera ay pinagkikitaan nang malaki ng *military industrial complex* ng US at isang paraan niya ng paglutas sa krisis ng kapitalismo. Tulad ng ginawa niya noong ikalawang digmaang pandaigdig, muling isinasapanganib ng US ang bansa at ang kaligtasan ng mamamayang Pilipino. Sa pagdami ng base militar ng US sa bansa, kandidato ang Pilipinas na maging target ng mga pag-atake o kontra-atake sakaling sumiklab ang digmang proxy sa pagitan ng US at China. Malinaw sa nilalaman ng estratehiyang militar ng US sa Indo-Pacific ang estratehikong papel ng Pilipinas sa pagtitiyak na mapanatili ng US ang hegemonya nito sa rehiyon—bilang istasyon kahanay ng Australia, Japan, South Korea at Thailand.

Minana ng batang Marcos ang pagiging taksil at kolaboreytor ng kanyang lolo at amang sina Mariano at Ferdinand Marcos. Tunay na makapili at traydor ang

matatandang Marcos na kabilang sa mga nakinabang sa kayamanan at kapangyarihang kinulimbat ng imperyalistang Japan sa panahon ng pananakop nito sa bansa noong 1942-45. Matapos matalo ang Japan at sa panunumbalik ng US sa bansa, mabilis namang pumaling si Ferdinand Marcos Sr. at naging pinakamasusugid na tagasilbi ng US sa loob ng 21 taong paghahari nito sa bansa.

Kapalit ang kapangyarihan at pondo para sa korapsyon, inihahain pang lalo ng ilehitimong rehimen ang bansa sa ibayong imperyalistang pandarambong at gera kontra-“terorismo” ng US. Malinaw ang lamang na pagkiling ng kanyang rehimen sa US kumpara sa nagdaang tiranikong rehimeng Duterte na nakikipaglaro pa sa dalawang nagriribalang imperyalistang bansang US at China. Matapos magpahayag ng pagiging bukas at pagtutulak sa *joint oil exploration* sa West Philippine Sea kasama ang China, inianunsyo ng kanyang rehimen ang pakikipagmabutihan sa US. Kaya naman hindi na nakagugulat ang pagiging labis na agresibo ng gubyerno ng China at mersenaryong tropa nito na nakabase sa mga inaangking teritoryo sa West Philippine Sea sa kapinsalaan ng mga mangingisdang Pilipino. Nitong Nobyembre lamang, hinaras ng Chinese coast guard ang isang tropa ng nagpapatrulyang Philippine Navy sa isla ng Pag-asa.

Tulad nina Marcos at Duterte, walang pinag-iba ang mga lokal na opisyaes ng Palawan na nagdiwang at ikinatuwa pa ang pagbisita ni Harris. Syempre, pangunahin silang nakikinabang sa mga pondong ibinubuhos ng US sa bansa kapalit ng garapalang pagpapakatuta at pagiging sunud-sunuran sa kagustuhan at interes nito. Milyun-

Ang Pulang Larangan

Ang Ang Pulang Larangan ay ang rebolusyonaryong pahayagang masa sa Palawan.

Pinapatnugutan ito ng Partido Komunista ng Pilipinas sa lalawigan ng Palawan sa gabay ng Marxismo-Leninismo-Maoismo.

Bukas ang pahayagang ito sa mga pagwawasto, komentaryo, mungkahi at ambag na lathalain.

milyong halaga ang kinulimbat ng mga lokal na opisyal ng lalawigan, maging ang WESCOM sa mga ayudang ibinuhos ng US sa nagdaang mga taon. Kabilang dito ang P1.6 milyong halaga ng *tent* at mga suplay medikal na donasyon umano ng US Embassy Civil Affairs Team (CAT) nitong Agosto.

Ang lantarang pagpapakatuta ng ilehitimong rehimeng Marcos II at mga lokal na opisyal ng Palawan sa imperyalismong US ay tahasang pagbebenta sa soberanya ng bansa at pagwalang bahalasa kaligtasan ng mamamayang Pilipino. May dalawang talim ang umiigting na panghihimasok-militar ng US sa bansa—una, ang paggamit sa bansa bilang base-militar nito laban sa mga karibal sa hegemonya, at ikalawa, ang pagpapaigting ng gerang panunupil ng estado laban sa lahat ng pwersang nakikibaka para sa pambansang kalayaan at demokrasya. Lalong pinalilinaw nito ang planong pagwasak sa rebolusyonaryong kilusan sa lalawigan sa nakaraang anim na taon ay nakatudla sa pagsupil sa lokal na pakikibakang bayan laban sa imperyalismo.

Pero sadyang nahihibang ang WESCOM, AFP, ang reaksyunaryong gubyrno at US sa paniniwala nitong maigugupo nila ang marubdob na pakikibaka ng mga Palaweño para sa pambansang kalayaan at demokrasya. Mula nang nakaugat sa lalawigan ang Partido Komunista ng Pilipinas, tulad sa iba pang bahagi ng bansa, nahinang na ang di-mapapatid na ugnayan dito ng mga Palaweño. Pinatunayan ito ng maringal na rebolusyonaryong kasaysayan ng lalawigan na kahit ilang ulit na naiwan ng hukbo bago tuluy-tuloy na nakilusan mula dekada '90 ay hindi namatay ang apoy ng rebolusyonaryong paglaban ng mga Palaweño. Palagi nilang hinihintay ang pagbabalik ng Bagong Hukbong Bayan, ang tunay nilang hukbo at tagapagtanggol.

Matatandaang matapos mabigo ang Joint Task Group-South at North ng WESCOM na itinayo noong 2017, binuo ang Joint Task Force Peacock noong 2020 sa hibang na pangarap na durugin ang rebolusyonaryong kilusan sa Palawan. Kasabay nito ang pagpakat bilang karagdagang tropang pasista ng 3rd Marine Battalion Landing Team (MBLT-3). Mula noon, inilunsad sa lalawigan ang pinakamatindi, pinakamalawak at pinakamasinsing atake laban sa nakikibakang mamamayan ng Palawan. Binuhusan ng pondo at rekurso ang WESCOM, ganundin ang lokal na TF-ELCAC sa pamumuno ni Jose Chavez



Alvarez sa tabing ng “gera kontra-terorismo” ni Duterte. Ito rin ang kontra-mamamayang gerang ipinagpapatuloy ng ilehitimong rehimeng Marcos at tiyak na lalo pa itong titindi sa susunod na mga panahon habang mas humihigpit ang kontrol ng US sa bansa.

Dapat tutulan at labanan ang lahat ng anyo ng panghihimasok ng US sa Palawan at buong bansa. Hindi nito dapat pahintulutang gawing pambala sa kanyon ang mga Pilipino o gawing lunsaran ng panibagong digmaan. Dapat ilantad at kundenahin ang lantarang pagpapakatuta ng ilehitimong rehimeng US-Marcos, mga lokal na opisyal ng Palawan at ng AFP at WESCOM sa lahat ng pakana ng US. Kasabay nito, dapat igiit at ipaglaban ng mamamayan ang pambansang soberanya at teritoryal na integridad ng Pilipinas.

Ang laban para ipagtanggol ang pambansang soberanya at teritoryal na integridad ng Pilipinas ay bahagi at pangunahing layunin ng demokratikong rebolusyong bayan. Dapat itong patuloy na isulong at paigtingin sa harap ng ibayong imperyalistang pagsaklot. **PI**

Naval Station Carlito Cunanan: base militar para sa ibayong panghihimasok at hegemonya ng imperyalismong US

Tumitindi ang interbensyong militar ng imperyalismong US sa Pilipinas upang tugunan ang estratehikong layunin nitong palawakin ang hegemonya sa buong Indo-Pasipiko at pahigpitin ang kontrol nito sa bansa at gamitin itong lunsaran ng pang-uupat ng gera sa karibal na imperyalistang China. Matingkad ito sa pagbisita ni US Vice President Kamala Harris sa bansa at sa probinsya noong Nobyembre 20-22. Kabilang sa layunin nito ang pagdadagdag ng lima pang bagong base militar ng US sa Pilipinas sa ilalim ng EDCA o Enhanced Defense Cooperation Agreement kung saan ang isa rito ay itatayo sa Palawan. Sa balangkas din ng EDCA naitayo ang Naval Station Carlito Cunanan (NSCC), isang baseng nabal ng imperyalismong US sa Oyster Bay, bahagi ng Ulugan Bay sa Palawan.

Ang estratehikong papel ng EDCA at NSCC sa Indo-Pasipiko

Ang EDCA ay isang hindi pantay na kasunduang militar sa pagitan ng Pilipinas at imperyalismong US na tumutugon sa estratehikong pagpihit ng US sa Indo-Pasipiko. Pangunahing nilalaman ng EDCA ang pagpaparami ng mga permanenteng base, tropa, at iba pang pwersang militar ng US sa bansa. Sa pamamagitan ng kasunduan na ito, nagkakaroon ng awtoridad ang US upang agresibong patindihin ang panghihimasok nito sa bansa para sa higit na kontrol at dominasyon sa ekonomya, pagkamkam ng yaman ng bansa, at paggamit ng papet na rehimen at reaksiyong hukbo nito sa Pilipinas para isulong ang sariling interes sa buong Asya-Pasipiko.

Malaking kabalintunaan ang pagbibigay-matwid ng imperyalismong US sa pagtatayo nito ng mga base militar sa bansa. Malinaw pa nga ang pagyurak nito sa pambansang kasarinlan ng bansa. Gayundin, nag-aasta ang US na ipagtatanggol ang karapatan ng Pilipinas sa West Philippine Sea, subalit ang totoo ay kakasangkapanin pa nga ng US at gagawing *launching pad* (lunsaran) at pusisyong militar ang bansa kapag sumiklab ang digmaan sa pagitan ng dalawang imperyalistang bansa. Patuloy pang ginatungan ng imperyalismong US ang tensyon sa pagitan ng US at China sa

rehiyon sa iba't ibang mapang-udyok na hakbangin nito sa mga nagdaang buwan.

Maaga nang nakita at sinamantala ng US ang estratehikong pusisyon ng Palawan sa Timog Silangang Asya bilang pantapat sa China, dahilan upang maging target ito ng US para pagtayaran ng baseng militar nito sa bansa. Ang NSCC na itinayo sa Oyster Bay sa Ulugan Bay ay isa sa dalawang base militar ng US sa probinsya kabilang ang

Antonio Bautista Air Base sa Palawan International Airport sa Puerto Princesa. Ang Ulugan Bay ay isang mayamang look sa Puerto Princesa, Palawan na may kabuuang sukat na 71 kilometro kwadrado. Matatagpuan sa loob nito ang isa pang look na Oyster Bay. Sinimulang itayo ang NSCC sa ilalim ng rehimeng US-Aquino II at lihim ding pinaunlad at pinagkagastusan ng daan-milyong pondo ng bayan upang maging “mini-Subic” para pagsilbihin sa mga sundalong Amerikano at maging



istasyon ng mga barkong pandigma ng imperyalismong US. Ang NSCC sa Ulugan Bay ay 160 km lamang ang layo sa Spratly Islands kung saan nakapusisyon rin ang mga pasilidad-militar ng China.

Ang NSCC ay bahagi rin ng naunang pagtitiyak ng US sa kontrol sa karagatan ng Indo-Pasipiko. Ipinagpatuloy at pinaunlad pa ito ng kasalukuyang rehimeng Biden sa inianunsyo nitong pagkakabuo ng Task Force 76/3. Ang TF 76/3 ay kumbinasyon ng mga pwersang nabal ng US Indo-Pacific Command na permanenteng nakaistasyon sa South China Sea. Permanente nitong palilibutan ang China ng mga *long-range missile* na ipapakat sa mga bansa sa “first island chain” (Japan, Taiwan, Pilipinas, Borneo, at iba pa). Alinsunod dito, inilunsad sa probinsya nitong Oktubre ang Kamandag 2022, isang ehersisyong militar sa pagitan ng tropa ng US at Pilipinas sa tabing ng integrasyon at interoperabilidad. Sa balangkas din ng TF 76/3 binuo ng US ang planong pagdadagdag ng isa pang bagong base militar nito sa probinsya.

Ginagamit ng US ang pagiging palaasa ng AFP at ng papet at ilehitimong rehimeng Marcos II sa ayuda ng US para palabasing kailangan ng Pilipinas ng presensyang militar ng US para ipagtanggol ito laban sa pang-aagaw ng China sa mga islang saklaw ng Exclusive Economic Zone (EEZ) ng Pilipinas sa West Philippine Sea. Kung totoong sinsero ito sa pagtatanggol sa Pilipinas, bakit sa kabila ng lantarang pang-aagaw ng China sa mga teritoryong saklaw ng Pilipinas at pagtatayo ng mga artipisyal na isla dito ay kikit-balikat at pawang buladas lamang ang US? Sa pagiging dependyente ng reaksyunaryong gubyerno ng Pilipinas at AFP sa US, binigyan pa nito ng walang limitasyong akses at paggamit ang militar ng US sa mga kalsada, himpapawid, at karagatan

ng Pilipinas para sa pagtransport ng mga tropa at kagamitang militar.

Wala ring senyales ng anumang pagtutol sa planong pagdaragdag ng base militar sa probinsya ang kasalukuyang gobernador ng probinsya na si Victorino Dennis Socrates, gayundin ang mga nagdaang lokal na reaksyunaryong gobyerno na pinamunuan ni dating gobernador Jose Chavez Alvarez sa panahong itinatayo pa lamang ang NSCC. Ang pagkikibit-balikat nina Socrates at Alvarez sa itinayong NSCC ay tanda ng pangangayupapa nila, pagiging taksil at bentador ng kasarinlan at soberanya ng Pilipinas sa imperyalismong US. Kapansin-pansin din ito sa pagpapahintulot nila sa nagkakailang pagsasanay-militar na inilunsad ng mga pasistang tropa ng US at Pilipinas sa probinsya.

Ang epekto ng pagtatayo ng base militar ng US sa mamamayang Palaweño

Nang itinayo ang NSCC sa Ulugan Bay, winasak nito ang kalikasan at nagdagdag ng polusyon ng kapaligiran. Nasagasaan ng mga itinayong imprastruktura at pasilidad-militar ng US ang mayaman at protektadong bakawan, gayundin ang mga baturang tirahan ng mga isda at iba pang nabubuhay sa karagatan. Wala ring mga permit mula sa Community Environment and Natural Resources (CENRO) ang pagpuputol ng puno sa sayt upang pagtayaran ng base samantalang itinuturing na *protected area* ang look. Pagkasira din ng kalikasan ang idinudulot ng mga pagsasanay militar at mga nakalalasong kemikal pandigma.

Matindi rin ang epekto nito sa buhay, kabuhatan at ari-arian ng nasa 1,700 residente ng Brgy. Macarascas, isa sa limang baryong nakapalibot sa Ulugan Bay. Malawakang pinalayas ang mga residenteng naninirahan sa lugar


matapos idemolis ang higit sa 100 tirahan upang bigyang-daan ang base militar. Nawalan ng lugar para sa hanapbuhay ang mga mangingisda dahil ang buong Ulugan Bay ay naging bahagi ng daungan ng malalaking barkong pandigma ng US. Samantala, ang mga kagubatan ng probinsya ay ginagamit bilang mga lunsaran ng mga pagsasanay ng mga sundalong Amerikano, dahilan upang pagbawalan ang mga Palaweñong magyayantok, magbabagtik at magpupulot na makapasok sa mga gubat na ito.

Naghasik din ng abusong militar ang US sa mamamayang Palaweño. Lumobo ang mga kasong pandarahas, pang-aabuso sa mga kababaihan at bata at iba pang mga paglabag ng mga mersenaryong sundalong Amerikano at AFP sa karapatang pantao ng mamamayan sa mga pinasaklaw na mga operasyon at pagsasanay militar ng US sa bansa. Halimbawa nito ang paglaganap ng prostitusyon at sex trafficking matapos itayo ang hilera ng mga *bar* o bahay-aliwan sa Puerto Princesa upang magsilbi sa mga sundalong Amerikano. May lumabas ding ulat na may isang *van* na naglalaman ng mga kababaihan ang ipinasok sa mismong sayt kung saan itinatayo ang NSCC. May mga ulat ring binabaril ng mga sundalong Pilipino ang bangka ng mga mangingisdang mapapalapit sa look.

Ang kasalukuyan at lumalalang pandaigdigang krisis na kinalulubugan ngayon ng imperyalismong US at ang pagkabahala sa lumalakas na impluwensya ng karibal na imperyalistang bansang China ang dahilan bakit tumitindi ang desperasyon ng US na higpitan ang kontrol sa Indo-Pasipiko at sa mga kolonya at malakolonyang bansa nito tulad ng Pilipinas. Planong gawin ng US na isang malaking base militar ang Pilipinas. Dahil dito, tumitindi rin


ang pandarambong at pagsasamantala ng imperyalismong US sa mamamayang Pilipino.

Kundenahin ang itinayong Naval Station Carlito Cunanan sa Ulugan Bay at iligtas ang kalikasan laban sa dayuhang pangwawasak! Dapat ding ipanawagan ng mga makabayang Pilipino ang pagpapabasura ng EDCA at iba pang mga hindi pantay na tratado, kasunduang ehekutibo, kaayusan, proyekto at ehersisyo ng militar na sumusuhay at nagpapanatili ng pagkapapet ng reaksyunaryong gubyrno at armadong pwersa nito sa imperyalismong US. Dapat na patuloy na tutulan at labanan ng mamamayang Palaweño, kaisa ng buong sambayanang Pilipino, ang pagtatayo ng mga base militar ng imperyalismong US na yumuyurak sa kasarinlan ng bansa.

Igiit ang independyenteng patakarang panlabas. Palayasin ang mga tropang Amerikano sa probinsya at buong bansa sa bawat paraang posible at kailangan. Dapat na isulong ang malawak na kilusang masa na nagtataguyod ng mga anti-imperyalistang pakikibaka sa buong bansa. Ang pambansa at panlipunang pagpapalaya lamang ang tanging bibigo sa imperyalistang adyenda ng US sa Indo-Pasipiko. 

BALITA

Mahigit 7000 Palaweño, apektado ng bagyong Paeng

Hinagupit ng Bagyong Paeng ang mga Palaweño mula Oktubre 28-30 na nagdulot ng malawakang pagbaha sa Hilagang Palawan. Aabot sa 5,872 indibidwal o 1,699 pamilya ang nagbakwit sa 95 evacuation center sa probinsya. Nasa 46 bahay ang nawasak, 290 naman ang nasira, 62 bangkang motor ang nawasak at 157 nasiraan. Samantala, may 227 mga pasahero naman ang naistranded sa bayan ng Coron mula Oktubre 28. 

Manggagawang Palaweño magkaisa, ipaglaban ang disente at nakabubuhay na sahod

Patuloy ang pagsirit ng presyo ng mga pangunahing bilihin at serbisyo habang nakapako ang sahod ng mga manggagawa. Kung mayroon mang pagtaas sa sahod kakarampot ito at ni hindi makahabol sa patuloy na pagtaas ng implasyon na nagpapalobo sa gastusin sa pang-araw-araw na pangangailangan ng pamilya ng mga manggagawa. Kaya ang laban para itaas ang sahod at sa nakabubuhay na sahod ang magiging kagyat na laban ng kilusang paggawa habang ang pangmatagalang layunin ay ibagsak ang sistemang kapital na siyang ganap na papawi sa sahurang-paggawa at magpapalaya sa uring manggagawa.

Barat na sahod

Ang mga manggagawa sa MIMAROPA ang may pinakamababang natatanggap na arawang sahod sa buong Region 4. Noong Mayo pa ng taong kasalukuyan sa bisa ng Wage Order # 19 (WO-19) nang huling magkaroon ng kakarampot na umento sa sahod na nagkakahalaga lamang ng P35 mula sa dating P294 na sahod ng mga manggagawa sa mga establisimyentong mas mababa sa 10-kataong manggagawa at sa dating P320 sahod sa mga may 10 pataas na manggagawa. Sa patuloy na pagbaba ng tunay na halaga ng sahod dahil sa naitalang 8% implasyon nitong Nobyembre 2022 kung saan nagbunga ng pinakamataas na pagsirit ng mga pangunahing bilihin sa buong bansa sa loob ng 14 taon, ay halos wala nang saysay ang napakaliit na idinagdag ng sahod. Sa Palawan kung saan mas mahal nang P5-10 kada litro ang presyo ng petrolyo kumpara sa NCR, mas mataas din ang presyo ng mga pangunahing bilihin laluna ang mga produktong ginagamitan ng petrolyo at mga produktong mula sa labas ng lalawigan. Malayong-malayo ang

kasalukuyang sahod na P329-P355 kumpara sa P1,119 *family living wage* (FLW) o nakabubuhay na sahod nitong Setyembre 2022.

Kumplikadong sistema ng pagpapasahod

Sa pagpapatupad ng RA 6727 o Wage Rationalization Act noong 1989, binasag ang dating pambansang minimum na sahod tungo sa mga panrehiyong minimum na sahod na itinatakda na ng mga *regional wages and productivity boards*. May kapangyarihan ang huli na pag-aralan, itakda at itaas ang minimum na sahod sa bawat rehiyon, probinsya o lokalidad batay sa itinatakdang mababaw na pamantayan ng kahirapan, dinoktor na tantos ng empleyo at karaniwang gastos sa araw-araw (cost of living).

Sa ilang dekadang pag-iral ng RA 6727, nagbunga ito ng kakaiba at mas masasahol na sistema ng minimum na pasahod sa bansa. Natatangi ang rehiyon ng Timog Katagalugan sa pinakabarat na sistema ng minimum na pasahod sa buong bansa kumpara sa ibang rehiyon, na nag-iiba-iba


lamang ang pasahod batay sa bilang ng mga empleyado sa empresa. Ito rin ang dahilan kung bakit ang Palawan ang may pinakamababang pasahod sa buong rehiyon. Mas masaklap pa simula nang maisabatas ang Wage Rationalization Act, nagsimula nang bumulusok pababa ang antas ng sahod ng mga manggagawa kumpara sa paglago ng tubo ng mga kapitalista. Sumahol pa ito dahil sa mga Executive Order, Wage Order at iba pang mga batas na ibayong umaatake sa karapatan ng mga manggagawa para sa disente at nakakabuhay na sahod (decent and living wage), seguridad sa trabaho (security of tenure) at karapatang mag-union (right to self-organization).

Ang laban sa pagpapataas ng sahod

Sa 33 taong pag-iral ng Wage Rationalization Law, umakyat na ang mga presyo ng mga pangunahing bilihin nang higit sa limang ulit, ngunit tumaas lamang ang sahod nang higit sa tatlong ulit. Ibig sabihin, hindi talaga nahahabol ng mga nakaraang umento sa sahod ang pagtaas ng mga presyo ng bilihin.

Kaya wasto at napapanahon ang pagsusulong ng General Wage Increase (GWI) upang kamtin ang kagyat na umento sa sahod para bawiin ang halagang nawala dahil sa implasyon. Karugtong ng pakikibaka sa dagdag sahod ang pagsusulong ng pambansang minimum na sahod upang wakasan ang umiiral na *wage regionalization* sa balangkas ng RA 6727 at kasabay ang panawagang ibasura ang RA 6727 na magbubuwag naman sa mga RTWPB o Regional Wage Board (RWB).

Upang manumbalik ang antas ng minimum na sahod sa halaga na mayroon ito noong 1989—kung saan umiiral pa ang pambansang minimum na sahod, kinakailangang umabot sa halagang ₱508-573 ang minimum sa sahod sa MIMAROPA. Ibig sabihin, ₱220 na umento ang kagyat na kinakailangan upang



makabalik ang sahod sa antas na naabot nito noong 1989. Ito ang makatwirang ipaglabang *across-the-board wage increase*. At ang laban sa pagsusulong ng GWI at pambansang minimum na sahod ay dapat maitaas sa laban tungong nakabubuhay na sahod (FLW) na P1,119.

Itaas ang sahod! ibaba ang presyo ng bilihin!

Dapat padagundungin sa mga protesta ang panawagang “Sahod, itaas! Presyo, ibaba!” Dapat singilin ang ilehitimong rehimeng US-Marcos-Duterte sa kapabayaan ng ayuda sa mamamayan na labis na pinahirapan ng tuluy-tuloy na pagtaas ng implasyon. Dapat igiit ang pagbabasura ng mga niratsadang neoliberal na mga patakaran sa ekonomiya at labis-labis na importasyon na pumapatay sa lokal na produksyon na siyang puno’t dulo ng pagsirit na presyo ng mga pangunahing bilihin at kawalan ng seguridad sa pagkain.

Dapat magkaisa ang manggagawang Palaweño para isulong ang kampanya sa pagpapataas ng sahod at kamtin ang iba pang benepisyo. Dapat silang mahigpit na makipagkaisa sa mga magsasaka at iba pang inaaping uri para isulong ang pambansa-demokratikong rebolusyon na may sosyalistang perspektiba na siyang tanging landas para sa kaunlarang pang-ekonomya ng bansa at magpapalaya sa uring manggagawa sa kapitalistang pagsasamantala at pang-aapi. PI

Tutulan at labanan ang pagpapatupad ng SIM Card Registration Law!

Leona Paragua
Tagapagsalita, NDF Palawan


Kaisa ng mamamayan ang NDF-Palawan sa pagkundena sa pagsasabatas ng SIM card Registration Law o RA 11934 bilang karagdagang instrumento ng pasista-teroristang estado laban sa nakikibakang mamamayan. Ginawang prayoridad ng ilehitimong rehimeng Marcos II ang pagpirma sa nasabing batas upang lubusin at kumpletuhin ang sistematikong paniniktik ng estado sa mamamayan.

Nagkukubli ang batas sa layuning “sugpuin ang mga kriminalidad sa cyber tulad ng *phishing*, pagnanakaw ng identidad, text scams atbp.. Kabaliktaran, layunin nitong ipunin ang dambuhalang impormasyon hinggil sa lahat ng aspeto ng buhay ng mamamayang Pilipino. Matagal nang ginagawang negosyo ng mga dambuhalang kumpanya ang tinatawag na Big Data o kalipunan ng mga impormasyong natitipon mula sa paggamit ng internet. Sa pagsasabatas ng SIM Card Registration Law, lalong magiging mabilis, sistematiko at malawakan ang pagtitipon nito.

Lansakang nilalabag ng batas ang isa sa saligang karapatan ng mamamayan hinggil sa pribasiya at iba pang demokratikong karapatang kaakibat nito. Sa pamamagitan ng sapilitang pagpaparehistro sa mga SIM card gamit ang tunay na pangalan at ID, lalong pakikitirin ng rehimen ang demokrasya sa bansa. Higit pa, pangunahing pagsisilbihan ng batas na ito ang mabangis na gerang kontra-mamamayan ng ilehitimong rehimen. Padadaliin nito ang pagtukoy at paniniktik sa lahat ng kritiko ng estado. Itutulak nito ang ibayong pagdami ng kaso ng mga paglabag sa karapatan

ng mamamayan at paglala ng kultura ng impyunidad sa bansa.

Gagamitin ito upang busalan ang bibig ng mga magnanais na isiwalat ang mga masasaksihan o mararanasan nilang krimen at katiwalian. Bubusalan ng estado ang karapatan sa malayang pagpapahayag ng opinyon, disgusto, maging ng mga lehitimong hinaing sa inutil at kurakot na gubyerno ni Marcos II gamit ang *cellphone*, *social media* at *internet*. Sa halip na masugpo ang kriminalidad, lalo lamang nitong patitindihin ang mga krimen tulad ng naganap sa ibang mga bansang nagpatupad ng kahalintulad na batas.

Dapat labanan ng bayan ang mapanupil na batas na ito. Kailangang aralin at ipaliwanag sa mamamayan ang nilalaman ng SIM Card Registration Law at ang implikasyon nito sa kanilang buhay at mga demokratikong karapatan. Nananawagan ang NDF-Palawan sa mamamayang Palaweño na tipunin ang lahat ng demokratikong pwersa sa lalawigan at makiisa sa malawak na kilusan para sa paglaban at pagpapabasura sa naturang batas. Kasabay nito ang tuluy-tuloy na paglaban sa pasista, inutil at ilehitimong rehimen. 

Mga residenteng naninirahan sa saklaw ng PQMI, pinalilipat ng City ENRO

Hinihikayat ng Puerto Princesa City Environment and Natural Resources Office(ENRO)angmamamayanngBrgy. Sta. Lourdes, kalapit ng abandonadong site ng Palawan Quicksilver Mines Inc. (PQMI) na lumipat para makaiwas sa risiko ng pagkakasakit. Ani City ENRO chief Atty. Carlo Gomez, nananatiling mapanganib ang site ng minahan kahit matagal nang tumigil ang operasyon ng PQMI.

Ang PQMI ay nagmina ng mercury sa nasabing lugar noon pang dekada 1970 at tumigil noong 1976. Nag-iwan ito ng napakaraming *mine tailings* na bumuo ng isang mala-islamang reklamasyon sabaybayin ng Honda Bay. Noong 2017, apat na dekada na ang nakalilipas, nalantad ang nagpapatuloy na epekto nito matapos magpositibo ang 70 residente ng Sta. Lourdes at Tagburos, mga kalapit ng site ng PQMI sa *mercury poisoning*. Resulta nito, inirekomenda ng Department of Health at DENR ang ebakwasyon ng 10,000 residente pero hanggang ngayon, walang kongkretong hakbangin ang lokal na gubyerno ng syudad, maging ng probinsya.

Taliwas din dito ang naging hakbangin ng Department of Agrarian Reform (DAR) na magkaloob ng Certificate of Land Ownership Awards (CLOA) na siya ngayong pinanghahawakan ng mga residenteng ayaw umalis sa lugar. Bagama’t naghanda umano ang lokal na gubyerno ng syudad ng *relocation* site para sa kanila, nangangamba ang mga residenteng kapag umalis sila ay mawawalan sila ng mga hanapbuhay.



Mga lokal na tuta ng US, ikinatuwa ang pagbisita ni US VP Harris

Tuwang-tuwa ang mga lokal na opisyal ng Palawan, at mga tuta ng imperyalismong US sa pagbisita ni US VP Kamala Harris nitong Nobyembre. Hindi magkanda-mayaw ang mga lokal na burukrata sa pagpuri kay Harris laluna nang pumunta ito sa isang komunidad ng mga mangingisda sa Brgy. Tagburos, Puerto Princesa City noong Nobyembre 22.

Sa pagbisita ni Harris, dala niya ang ilang mga kasunduan sa pagitan ng US at Pilipinas. Kabilang sa mga ito ang pagtatayo ng karagdagang lima pang kampo/pasilidad militar ng US sa bansa na ang isa ay nakatakdang itayo sa Palawan. Hindi man lamang ito tinutulan ni Marcos Jr. at ng mga alipures niyang opisyal sa Palawan. Bukod pa ang pagtatayo ng pasilidad nukleyar sa bansa para umano lutasin ang suliranin sa kuryente.



Samantala, mariin itong kinundena ng National Democratic Front of the Philippines-Palawan. Ani Leona Paragua, tagapagsalita nito, "tahasang pagyurak ng US sa pambansang soberanya ng Pilipinas ang pagdadagdag ng bagong base-militar nito sa Palawan." Dagdag pa niya, "dapat ipagtanggol ng kasalukuyang henerasyon ang soberanya ng bansa laban sa imperyalistang interbensyon at isulong ang adhikaing kamtin ang pambansang kalayaan at demokrasya sa pamamagitan ng matagalang digmang bayan." **PH**

Kolonyal na pagsasanay na Ph-US Kamandag 2022, inilunsad

Inilunsad noong Oktubre 3-13 ang pang-anim na pagsasanay-militar sa pagitan ng mga tropa ng US at Pilipinas sa Palawan ngayong taon, ang Kaagapay ng Mandirigma ng Dagat (KAMANDAG) Operations sa Puerto Princesa City. Inilunsad sa Brgy. Inagawan Sub ang pagsasanay sa pagpapatakbo ng *unmanned aerial system* habang sa Brgy. Kamuning naman inilugar ang pagsasanay sa *small boat operation*.

Ang KAMANDAG Exercises ay anim na taon nang isinasagawa sa bansa sa pagitan ng papet na AFP at tropang US. Naglalayon umano itong maipakita ang kakayahan ng bawat sundalo para sa natatanging mga kaalaman at abilidad, hindi lang sa taktikal na operasyon, ispesyal na operasyon kundi maging sa *combined* o pinagsanib na interoperabilidad kalangkap ang *maritime awareness* at depensang kostal.



Samantala, inilunsad naman nitong huling linggo ng Setyembre ang unilateral na pagsasanay na Pagsisikap 2022 ng Naval Forces West (NAVFORWEST) sa Brgy. Samariñana, Brooke's Point. Isa itong taunang unilateral na pagsasanay ng Philippine Navy na may tutok umano sa kakayahang maglunsad ng *amphibious operation*. **PH**

Oil drilling sa Cadlao, panibagong dagok sa kabuhayan at kalikasan ng Palawan

Pinahintulutan na ng ilehitimong rehimeng Marcos II at lokal na gubyrerno ng probinsya ang operasyon ng *oil drilling* sa Cadlao *oil field* sa saklaw ng El Nido para sa kumpanyang Nido Petroleum Philippines Pty. Ltd. Nakatakdang magsimula ang operasyon ng kumpanya sa susunod na taon na pinangangambahang sasaid sa likas na yaman ng isla. Nauna nang sinusindi ang *oil drilling* sa isla noong 1991 matapos makuhanan ng 11 milyong bariles ng langis. Nilanaan ng pondong aabot sa \$72 milyon ang naturang proyekto na may dalawang bahagi—eksplorasyon at pagtatasa.

Ani Leona Paragua, tagapagsalita ng NDFP-Palawan, “sa pagsasabwatan ng mga lokal na malalaking burgesya-kumprador, mga burukrata kapitalista at mga dayuhang monopolyo-kapitalista, labis-labis na dinadambong ang likas na yaman at winawasak ang kapaligiran ng Palawan. Isinasadlak nito ang mamamayang Palawean sa kahirapan at pinagkakaitan ng yaman ng bansa at serbisyonang panlipunan...” **PI**

Pagpapaunlad sa Culion para sa turismo, isinusulong



Isinusulong ngayon ng Culion Municipal Tourism Office (MTO) ang pagpapaunlad sa isla ng Culion, isa sa pinakamagagandang isla sa hilagang Palawan. Sa atas ni Mayor Virginia de Vera, nilunsad nitong Nobyembre 16 ang MTO *tourism code workshop* para sa pagkukumpleto sa mga rekisito nito. Ang nasabing *workshop* ay dinaluhan ng mga *stakeholders*, ahensya ng gubyrerno at mga *tourism site owners* para pagtalakayan ang mga ideya at suhestyon na lalamnin ng *tourism code*. Matapos ito, pininal ang *tourism code* ng isang *technical working group* na ipapasa para sa pag-apruba ng Sangguniang Bayan.

Matatandaang noong 2006, idineklara ng Palawan Council for Sustainable Development (PCSD) ang sangkapat ng Culion na sumasaklaw sa 11,209 ektarya bilang “core zones” at bahagi ng itinuturing na Environmentally Critical Areas Network (ECAN). Sa ilalim ng RA 7611, ang batas na lumikha sa PCSD noong 1992, ang mga *core zones* ay mga lugar na bibigyan ng maksimum na pangangalaga at buu-buong poprotektahan at pananatiliing malaya sa paggalaw o pakikialam ng tao (human disruption). Pero noong 2018, sa bisa ng resolusyong 18-646, inalis ng PCSD ang proteksyon sa maraming lugar sa Culion para bigyang-daan ang pagbubuyangyang sa bayan sa eko-turismo. Nanganganib na mawasak ang kapaligiran ng Culion at probinsya ng Palawan dahil dito. **PI**

Modernisasyon at mapanlinlang na operasyong RCSP, pokus ng WESCOM

Sa halip na ilaan sa ayuda sa gitna ng implasyon at mababang kita, tinututukan ng WESCOM ang pagtatayo ng karagdang mga pasilidad militar at pagbili ng mga kagamitan at armas sa ilalim ng programang modernisasyon ng AFP. Kabilang sa mga nakahanay bilhin ng WESCOM ang *combat utility helicopter*, *heavy-lift helicopter*, mas malalaking *unmanned aerial system* at *advanced* na kagamitan sa komunikasyon.

Samantala, pokus ngayon ng mga yunit ng Western Command sa Palawan ang paglulunsad ng mapanlinlang na mga operasyon ng *retooled community support program* (RCSP) sa iba’t ibang bahagi ng probinsya. Ipinagmamalaki nila ang mahigit 200 umano nilang napasukong mga kasapi ng BHB Palawan at mga tagasuporta nito na kalakha’y mga peke at sapilitang pinasuko. Sa mga aktibidad na ito, iniharap ng WESCOM ang mga kontra-rebolusyonaryong taksil tulad ni Justine Kate Raca para maghasik ng kasinungalingan hinggil sa rebolusyonaryong kilusan. **PI**

Mga sundalong Pilipino, hinaras ng mga Chinese Coast Guard sa WPS

Hinaras ng mga Chinese Coastguard ang isang yunit ng Philippine Navy na nagpapatrulya sa isla ng Pag-asa sa saklaw ng West Philippine Sea (WPS) noong Nobyembre 20. Nangyari ang kumprontasyon sa panahong hinihila ng mga sundalong Pilipino ang isang pinaghihinalaang *debris* ng *rocket* sa lugar nang putulin ng mga Chinese coast guard na lulan ng isang *inflatable boat* ang lubid. Pagkatapos ay sinundan ito ng mga pagsabog na narinig ng mga residente ng Pag-asa. Kagyat itong kinundena ng iba’t ibang grupo, pero hanggang *diplomatic protest* pa rin ang ginagawa ng rehimeng US-Marcos II. **PI**

Ang WESCOM, AFP-PNP at tropang US ang naghahasik ng terorismo sa Palawan

Andrei Bon Guerrero

Tagapagsalita, BVC-NPA Palawan

Hangga't nananatili ang WESCOM at ang base militar ng US sa lalawigan, hindi natatapos ang pasismo-terorismong inihahasik nila sa Palawan. Ito ang tugon ng Bienvenido Vallever Command-NPA Palawan sa pinakahuling kasinungalingang ibinulalas ng AFP Western Command (WESCOM) at Palawan PTF-ELCAC na *terrorist-free* na umano ang lalawigan matapos umano nilang manyutralisa ang signipikanteng bilang ng CPP-NPA-NDFP. Para paniwalain ang publiko, sunud-sunod ang pagbabandera ng WESCOM ng bilang ng mga sumuko umanong kasapi ng rebolusyonaryong kilusan. Paulit-ulit pang binabansagan ang rebolusyonaryong kilusan bilang terorista at pagturing sa makatwirang pakikibaka ng sambayanan bilang mga akto ng terorismo. Ang problema, wala nang naniniwala sa kanila dahil kahit ang burgis na korte ay nagsasabing makatwiran, at hindi dapat ituring na terorismo ang rebolusyong inilulunsad ng CPP-NPA-NDFP kasama ang malawak na mamamayan para sa dakilang mithiin ng pambansang kalayaan at demokrasya.

Para sa mga Palaweño, ang tunay na terorista ay ang AFP-PNP sa pamumuno ng WESCOM na nagdudulot ng perwisyo sa kanilang buhay at kabuhayan. Sila (AFP-PNP) yaong mga nagbabawal sa mga Palaweño na magpunta sa kanilang mga kaingin at pook-hanapbuhay, nagpapataw ng *curfew* sa kanilang baryo, nagbabantay sa mga minahan, plantasyon ng *oil palm* at iba pang dambuhalang proyektong dahilan ng pagpapalayas sa mga magsasaka at katutubo sa kanilang mga lupain, at higit sa lahat, ang nangwasak sa kanilang kalikasan at lupaing ninuno. Sila yaong gumagastos nang malaki sa pagbili ng mga bala't pampasabog na ginagamit laban sa karaniwang mamamayan sa halip na tumulong na makaahon sila sa hirap. Sila yaong mga pinasisweldo ng perang pinaghirapan ng taumbayan at nanghihiram ng tapang sa mga naghahari at sa malalakas nilang armas. At sila ang walang tigil na nanghahaliyaw sa kanilang mga komunidad, nananakot, nanghahas, nang-aaresto at pumapatay sa tabing ng gerang "anti-terorismo".

Sa katunayan, sa buong 2022 hindi na tinantanan ng WESCOM ang Palawan sa paglulunsad ng mga pagsasanay-militar. Pitong beses itong naglunsad ng pagsasanay kung saan ang anim ay inilunsad kasama ang US. Sa mga pagsasanay na ito, walang puknat ang ginawang pagpapasabog at pagpapaputok ng mga mersenaryo at papet na tropa, ganundin ang pagpapalipad nila ng mga *military drones* at *helicopter* na naghatid ng ligalig at perwisyo sa taumbayan. Paulit-ulit itong inireklamo ng mga Palaweño dahil bukod sa natatakot silang maaksidenteng madamay ay hindi sila pinaabisuhan, ni kinonsulta kaugnay nito.


Dapat patuloy na ilantad at kundenahin ng bayan ang mga krimen at karahasan ng WESCOM, ng buong AFP-PNP at ng ilehitimong rehimeng Marcos II. Dapat buong-giting na labanan ng bayan ang marumi at brutal nilang gera sa pamamagitan ng paglulunsad ng lahat ng tipo ng pakikibaka at pagpapaigting ng digmang bayan sa kanayunan. Tanging sa pamamagitan ng demokratikong rebolusyong bayang isinusulong ng mamamayan sa pamumuno ng CPP maibabagsak ang pasista-teroristang estado ng mga lokal na naghaharing uri at imperyalista. **pr**

BHB at NDF-Palawan, nagbigay-pugay sa kadakilaan ni Ka Joma

Pinakamataas na pagpupugay ang iginawad ng National Democratic Front-Palawan at yunit ng Bienvenido Vallever Command-BHB Palawan sa dakilang lider-komunista at gabay ng rebolusyong Pilipinong si Jose Maria "Ka Joma" Sison. Pumanaw si Ka Joma noong Disyembre 16 sa Utrecht, The Netherlands sa edad na 83. Sa isang pahayag na inilabas ng NDF at BHB Palawan noong Disyembre 22, "Hindi maisasantabi ang mga dakilang ambag at aral niya upang dalhin ang rebolusyong Pilipino sa wastong landas. Isang mapanuri, mapanlikha at mapangahas na dakilang lider komunista, kumprehensibo at napakatalinong inilapat ni Ka Joma, kasama ang iba pang mga dakilang lider ng Partido, ang Marxismo-Leninismo-Maoismo sa kongkretong kalagayan at praktika ng rebolusyong Pilipino laban sa imperyalismo, pyudalismo at burukrata kapitalismo. Kaya naman nailatag, nakaugat, nakapanatili at ibayong nakasulong ang rebolusyong pinasimulan nila sa kabila ng desperadong pagtatangka ng mga nagpalit-palitag rehimen na durugin ito. Tinangkilik, niyakap at inangkin ng mamamayang Pilipino ang linyang dala ng PKP sa tanglaw ng MLM."

Inialay nila ang pagdiriwang ng ika-54 anibersaryo ng PKP sa probinsya sa pagdakila sa buhay ni Ka Joma at mataas na diwa ng pagsuong sa lahat ng kahirapan at sakripisyo para sa katuparan ng dakilang mithiin ng rebolusyong pinasimulan niyang isulong.

Panghuli, sinabi ng pahayag na "Bagamat nasawi si Ka Joma, ang kanyang buhay ay nagpapatuloy bilang gabay at inspirasyon ng nakikibakang mamamayang Pilipino at uring inaapi at pinagsasamantalahan sa buong mundo. Ihahatid tungong imortalidad at pagiging bayani ng rebolusyon si Ka Joma sa kanyang diwang rebolusyonaryo na nagsulong ng interes ng uring proletaryado at iba pang uring anakpawis." **pr**



PULANG SALUDO

Jose Maria “Ka Joma” Sison

“Walang dakilang bagay na makakamit kung walang dakilang pakikibaka at sakripisyo. Ang lahat ng sakripisyong inilalaan para sa pambansa-demokratikong layunin ay kapaki-pakinabang at hindi masasayang. Ang mga ito ay kinakailangan para kamtin ang kasalukuyang lakas ng pambansa-demokratikong kilusan.”

—Ka Joma (mula sa isang panayam sa WHO)
Disyembre 1981



Si Ka Joma ay kilala rin bilang si Amado Guerrero, ang tagapangulong tagapagtatag ng Partido Komunista ng Pilipinas at Bagong Hukbong Hukbong Bayan. Inialay niya ang kanyang buong buhay, lakas at talino para sa uring manggagawa at sa lahat ng inaapi at pinagsasamantalang mamamayang Pilipino at iniugit ang landas ng rebolusyonaryong pagbabago sa Pilipinas. Nagbigay siya ng malaking panahon at ambag sa pagsusulong ng pandaigdigang kilusang proletaryo at pumagitna sa paglaban at pagtatakwil sa modernong rebisyonismo at pagtatanggol sa kawastuhan ng Marxismo-Leninismo-Maoismo bilang teoretikong tanglaw sa pagpapalaya ng uring manggagawa at sangkatauhan sa kuko ng imperyalismo at lahat ng uri ng reaksyon.

Nagmula siya sa uring panginoong maylupa (PML) pero tinalikuran niya ang marangyang pamumuhay at niyakap ang interes ng uring api at pinagsasamantalahan sa Pilipinas. Wala siyang sinayang na sandali ng kanyang buhay para iambag ang lahat ng kanyang makakaya sa pagsulong ng rebolusyong Pilipino. Dahil sa kanyang mga wastong pagsusuri sa lipunan at rebolusyong Pilipino, milyun-milyong mamamayan ang namulat at tumahak sa landas ng rebolusyon at nag-alay ng buhay para sa pambansa-demokratikong adhikain.

Siya ang nagturo sa mga proletaryong Pilipino kung paano pamumunuan ang rebolusyong Pilipino na may dalawang yugto—ang demokratikong rebolusyong bayan na may sosyalistang perspektiba na siyang tanging landas para maibagsak ang mapang-api at mapagsamantalang sistemang malakolonyal at malapyudal at makamit ang kalayaan, demokrasya at sosyalismo sa Pilipinas. Ibinatay niya ang kanyang mga pagsusuri sa matatagumpay na rebolusyong proletaryo sa daigdig at sa mapanlikhang paglalapat ng Marxismo-Leninismo-Maoismo sa kongkretong kalagayan ng lipunang Pilipino.

Natatangi ang papel ni Ka Joma para sa muling pag-usbong at pagyabong ng rebolusyong Pilipino na nawaldas ng mga pagkakamali ng lumang pinagsanib na Partido na pinamunuan ng dinastiyang Lava. Maging sa panahon ng muling tatag na Partido Komunista ng Pilipinas kung saan dumaan sa masasalimuot na liko’t ikot, patuloy na naging gabay ang kanyang mahigpit na pagtalima sa mga batayang prinsipyo ng Marxismo-Leninismo-Maoismo at matalas na nagsuri sa lipunan at rebolusyon na naging giya para patuloy na taluntunin ang wastong linya sa ideolohiya, pulitika at organisasyon.

Masaklaw at malalim ang mga naiwang turo at gabay ni Ka Joma para sa proletaryong Pilipino at pandaigdigang kilusang sosyalista. Sapat-sapat ang mga ito para ihatid sa tagumpay ang rebolusyong Pilipino. Sadyang kapos ang parangal para isa-isahin ang mga nagawa ng dakilang Ka Joma para sa sambayanang Pilipino. Sa pagpanaw ni Ka Joma, nawalan ang uring manggagawa at uring anakpawis ng pinakadakilang Pilipinong Komunistang lider at teoretisyan na nabuhay sa kanyang henerasyon. Ang pagpanaw ni Kasamang Joma ay hindi ang wakas, kundi ang pasimula ng mga bagong usbong na mga proletaryong rebolusyonaryong Pilipino para ipagpatuloy ang nasimulan ni Ka Joma at ng iba pang rebolusyonaryong martir. Hamon sa bawat isa sa atin na masusing aralin at ilapat sa kongkretong praktika ang aral at gabay, ang mga matalas na pagsusuri ni Ka Joma sa iba’t ibang usaping pambansa at panlipunan.

Ang ganap na tagumpay ng rebolusyong Pilipino ang tunay na maihahandog natin sa pagpaparangal kay Ka Joma dahil ito lamang ang magiging katuparan at lulubos sa isinusulong nyang adhikain sa kanyang buong buhay para sa bansang Pilipinas. Gawin natin ang buong makakaya at ialay ang ating mga sarili upang dalhin hanggang tagumpay ang bagong tipong pambansa-demokratikong rebolusyon sa Pilipinas. **PH**